



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 6 Yangia anidakangma : Tir Yimiyim

tiryimiyim@aolima

tir yimiyim

TAPAK 7

TIPRA Motha-i Tripura nung sorkar akümtsü makok: Assam CM

Pope Francis-i South Sudan semdangtsü lia azüdokshiba nisung 27 asü



VOL. XX NO. 113 (ADOK 113) DIMAPUR

KÜPTOKNÜ (SATURDAY)

TSÜKLAI (FEBRUARY) 04, 2023

₹ 5.00

## Independent candidate kati mezüngbuba nomination süogo

**Dimapur, February 3, 2023 (TYO):** 14 buba Nagaland Legislative Assembly indang election atema nomination mapang lapoktsür anogo pezübuba nung tanü mezüng atema

Independent candidate kati tenüng agütsüogo. Iba nisung ya Hayithung Tungoe Lotha lir aser pai Wokha district kübok 37-Tyui assembly constituency nungi tokteptsü tenüng agütsü.

## NDPP MLA 9 NLA nungi anenogo

**Dimapur, February 3, 2023 (TYO):** Nagaland Legislative Assembly nungi MLA 9-i pei pei menden yutsüba shiditem agütsüba NLA Speaker-i agizükogo.

Ano, February 3, 2023 nü 18-Chazouba A/C NDPP MLA Dr. Chotisuh Sazo, 15- Southern Angami-II A/C NDPP MLA Er. Zale Neikha, 20-Meluri A/C NDPP MLA Yitachu, 8-Western Angami A/C NDPP MLA Kenezhakho Nakhro, 3-Dimapur-III A/C NDPP MLA Azheto Zhimomi aser 42- Wakching A/C NDPP Y.M. Yollow Konyak nungeri parnok menden yutsüba shiditem agütsüba liasü.

February 2, 2023 nü 32-Atoizu A/C NDPP MLA Er. Picto Shohe, 21-Tuli A/C NDPP MLA Amenba Yaden aser 57-Thonoknyu A/C NDPP MLA L. Khumo nungeri pei pei menden yutsüba shidi agütsüba liasü.

## Sorkar garitem meyipa agütsü

**Dimapur, February 3, 2023 (TYO):** Nagaland Chief Electoral Officer-i Chief Secretary dang Minister, Advisor aser MLA tem nem sorkar gari talila agütsüba meyipa meshitsü atema tetuyuba agütsüogo.

official mapa atema dang sorkar garitem amshitsüla, ta Addl. Chief Electoral Officer, Ruokuo o Khezhe-i shidi nung shia lir.

Iba dak sendakba nung Nagaland Chief Secretary-i Nagaland sorkar indang Administrative Heads of Department aser Heads of Department dang Minister, Advisor, MLA tem nem sorkar gari talila agütsüba meyipa meshitsü atema tetuyuba agütsütsü mepishir, ta Addl. Chief Electoral Officer-isa metetdaksüogo.

Nagaland Legislative Assembly, 2023 indang General Election asoshi Model Code of Conduct tenzükogo aser iba nung election mapa nung sorkar gari mamshitsü tenokdangba agütsüba lir. Minister, Advisor, MLA temi parnok official residence nungi office-i aodang mesüra

## JDU candidate-i party toktsür LJP nung aden

**Dimapur, February 3, 2023 (TYO):** 5 Ghaspanti II nung Kitoho S Rotokha nem Janata Dal United ticket agütsüba sülen anogo pezü lir tanü pai party nungi anenogo.

national Yuva president Pranab Kumar aser LJP state party lennirtemi parnok pelaa agizük.

LJP party-i pa aniokba atema pelar aser LJP lennirtem taginüba atongtsüsa inyaksü ta Rotokha-i ashi.

Nagaland assembly election atema LJP party indang ticket alemba sentong asüng Dimapur nung agütsü aser idangji candidate 24 shi ka nem party ticket agütsütsü.

Külen, JDU national secretary Afaque Ahmad Khan-i Kitoho S Rotokha party nungi anentsüba osang metetdaksü.

Rotokha-i party anema inyaksangshiba atema anentsür aser pai Nagaland nung JDU tenüng menüksüba atema ozüngi melaba ama mapa inyaksü ta Afaque Ahmad Khan-i ashi.

JDU Nagaland ya NSN Lotha, Hatpha Wang, Imsumongba Pongen aser tangartem lenisüba kübok lir aser parnok ya JDU indang National office-i pusema nungittsü, ta Khan-isa metetdaksü.

Hokolbarnü Rotokha den külemi JD-U state executive ketdangpurtemi party toktsür Lok Janshakti Party (LJP) nung denogo.

"Nagaland state JD-U state president lenisüba nung tamang makaba agi onoki party toktsütsü lemtet" ta JDU state secretary Obed Sumi-i ashi.

"State president-i pai bilemba ama dang inyaker aser maongka kecha magütsür. Iba ajanga Nagaland nung party züngsemtem tsüngda osangtsüsang agitepba nung timtem ajurur. State president-i party renloktsüsa mapa meinyaker aser iba jagi party züngsemtemi teimla aser tejangraba samaogo" ta paisa metetdaksü.

Hokolbarnü Rotokha den külemi JD-U party züngsemtemi LJP nung aden aser idangji LJP

(Maneni tapak 8 nung...)

## Yimteni election-i enürtem moatsübaji tim, saka election-i inür nokdangbaji tai : High Court



**Kohima, Feb.03 (TYO) :** Asen lima nung tang ama election mapang yimtsüngtemi pei pei yim "Senso Candidate" shimba maparen nung yakanü Gauhati High court, Kohima bench nung obendangeri obendang agütsüba ka nung, putu menden aser senso mungdangi election inürtem moatsüba atema kecha tai mali saka pei sensosangertem rongnungi election-i yoktsü ka shima yur tangar teyinürtem nokdangbaji tai, aji linük temzüng anema lir ta metetdaksüogo.

Mongsenyimti Senso Mungdangi 2021 küm December 28 nü Wb.Tongpang Ozüküm nem "Shilu Maong" agütsür ta lemtetba nung amendaker, Mongsenyimti Riongsanger Putu Mendeni 2023 Nagaland State Assembly Election nung 24-Angetyongpang Assembly Constituency nungi Mongsenyimti Senso Mungdangi 'Shilu Maong' agütsüba nisung

dak alaka Mongsenyimti nunger shinga iba kasa constituency nungi election-i aitsü memelar, shibai tashi mangalir, pa mesüra laji putu mendeni ajatsü aser tapet temerenshi agütsütsü ta telemtetba agir sangdongba ken o anema Mongsenyimti senso Wb.S.Maongkaba Ozükümi okadak ken o benokbatem angadanger obendangeri iba obendang ya yakanü agütsü.

Kasa okadak obendangeri Wb.S, Maongkaba Ozükümi benokba ken o aser Mongsenyimti Senso Mungdangi nungi aruba ken o ajak jungjunga angadanger, Mongsenyimti Senso Mungdangi par senso ka nem tanaben temoatsü agütsüba 'shilu maong' telemtetba nungji mekongshitsür, saka iba telemtetba jagi election maparen nung kenyongi metangshitsüla ta obendang agütsüba lir. Ano kasa obendang nungsa, Mongsenyimti putu mendeni tang Nagaland

state assembly election nung parnoki temoatsü agütsüba nisung dak alaka Mongsenyimti nunger shinga election-i maitsü ta lemtetba aser iba dak sendakba nung parnok putu mendeni telemtetba agibatam ajak kasa okadak obendangeri aitsüogo aser itemji mapa kuma mamshitetsüsa obendang agütsüogo.

Mongsenyimti senso Wb.S.Maongkaba Ozükümi Angetyongpang assembly nung election-i inüa liasü, saka Mongsenyimti putu mendeni pa nokdangba anema pai okadak iba ken o ya benoka liasü.

"Mongsenyimti Riongsanger putu mendeni 24-Angetyongpang Assembly Constituency nung election agütsüba maparen nung jakdaka Mongsenyimti nunger ka mejeteta yariba aser tangar shinga electioni aitsü memelaba mapa nungji timtem lir, ibaji temzüngi memelar, anungji Mokochung Deputy Commiissioner-i temzüng nung shia aliba ama Mongsenyimti Riongsanger Putu mendeni dak tapet mapa inyaksüla aser parnok dak inyakba osangji iba osang agizükba anogo nungi zünga hopta asem tsüngda okadak Registry ket tongtsütsüla," ta obendangerisa kasa obendangba ken o nung metetdaksüogo.

## NPF-i candidate 16 nem ticket agütsüogo

**Kohima, February 3, 2023 (TYO):** Nagaland nung regional political party tejentiba Naga People's Front (NPF)-i Hokolbarnü February 27 elections atema mezüngbuba candidate tarensen metetdaksüogo.

NPF working president Apong Pongener-i tanü candidate 16 tenüng metetdaksüba nung NPF legislature Party leader Kuzholuzo Nienu (Phek), MLA Khriehu Liezietsu (Northern Angami-I) aser MLA Kezhienyi

Khalo (Chizami) nunger dena lir. Tanüngba candidate temji Henry Zeliang (Tenning), Kingudi Joseph (Peren), Vivolie Kezo (Pfutsero,) Sovenyi (Chozuba), S. Akho Leyri (Meluri), Dr. Roland Lotha (Sanis), Achumbemo Kikon (Bhandari), Tahwang Angh (Tizit), Wanglem Konyak (Tapi), Er. C. Kawang Konyak (Tehok), D. Yongnyak Konyak (Moka), Yangdipi Sangtam (Tuensang Sadar-II) aser H. Zungkum Chang (Longkhim Chare)

nunger lir.

Tanü NPF Party Central office nung ticket alemba sentong ka agi agia liasü saka parnok 16 nungi candidate ka medetet aser tanüngba candidate 15 nem NPF president aser taoba Chief Minister Dr Shurhazelie Liezietsu-i ticket lema agütsü.

NPF Party ticket aginür nisung aika lir aser Deobar nikongdang tashi nung candidate tanabuba tarensen metetdaksütsü, ta Dr Shurhazelie-i ashi.

## J&K nung ama BJP-i Nagaland indang Arlla 371 (A) agientsü: Congress

**Dimapur, February 3, 2023 (TYO):** BJP-i Kashmir nung inyakba ama Nagaland nunga inyaka Arlla 371 (A) agientsü ta Congress media coordinator Mahima Singh-i ashi.

BJP-i J&K nung People's Democratic Party (PDP) den tesentaktep liasü saka parnoki ozüng alema Arlla 370 agienogo ta Congress Bhavan nung osangbener den jembidang Mahima-i ashi. Iba ajanga J&K nungi state

statehood agienogo aser nübortem asoshi 'special status' mali kümogo. J&K nung PDP aser Meghalaya nung National People's Party (NPP) ama BJP-i parnok den yariteper sendokogo, ta laisa ashi.

Nagaland chief minister Neiphiu Rio'er Nationalist Democratic Progressive Party (NDPP)-ia Kashmir nung PDP-i ajuruba tia kasa ajurutsü kechiyong 2022 nung

Enforcement Directorate (ED)-i chief minister's office tongogo, ta Mahima-isa ashi.

Naga nunger maitsü ya kanga balaka saka NDPP den medemer tajung BJP-ibo iba ya magizüker. Parnoki lisopurtem (Adivasi) nungi arem/min nung alirtem (Vanvasi) kümdaktsünür, iba ya BJP-Hindu Rashtra Project ka lir aser tanü iba ajanga Naga nunger jengjang samatsütsü, ta lai ashi.

(Maneni tapak 8 nung...)

### Mokokchung nung H&FW Department senden amen



Dr. Limatula Aier, CMO Mokokchung ajanga 4th Quarter District Review Meeting nung jembidang tangokba noksa nung angur.

**Dimapur, Tsüklai/February 03 (TYO):** Health and Family Welfare Department indang 4th Quarterly District Review Meeting ka Chief Medical Officer, Mokokchung indang Conference Hall nung February 3, 2022 nü mena liasü. Iba senden ya Dr. Limatula Aier, Chief Medical Officer, Mokokchung lenisüba kübok

menas liasü. Chief Medical Officer, Mokokchung ajanga züngsem ajak pela agizük aser pei health unit tem junga ketdang asütsü ajungshi aser health unit ajak shidak lapoka mapa inyaksü shia liasü. Laisa ASHAs, ASHA Co-ordinators, Block programme Managers aser Medical Officer

tem amalitep kaa sentong balala takok ngua inyaksü aser mapang shidak nung mapa inyakba osang shidak agütsütsü nenshia ashi.

CMO-isa Medical Officer tem dang pei posting tesem nung alitsü aser saksalema alitsü ajungshia liasü.

Iba sentong nung Dr. Ayangla Saku UIP & RCH, Dr. Toshila DTO, Dr. Limanaro DPO, Dr. Toshimongla Longkumer District Epidimologist aser Imkummongba DVBD Consultant nungertemi PowerPoint presentation agüja liasü.

Iba senden nung CMO, Dy.CMO, Programme Officers, Medical Officers, Staff Nurses, DPM, DAPCU, ASHA Co-ordinators, DCM, BPMs, NHP aser IEC personnel tem dena liasü.

### JDU candidate party toktsür LJP nung aden

**Dimapur, Tsüklai/February 03 (TYO):** 5 Ghaspani II nungi Janata Dal United indang candidate ka ama sangdonger anogo pezü dang junger Kitoho S Rotokha den state executive office bearers tem Hokulbarnü party nungi anener Lok Janshakti Party (LJP) nung denogo.

Hokulbarnü Dimapur nung osangbener senden ka nung iba osang sangdong dang JDU state secretary Obed Sumi-i ashiba agi, JDU state tir lenisüba nung temolung melemtetba ajanga parnok ajunga party züngsem nungi anentsü molungtepa pangjemtep.

Tir-i pa molungba nung party aniba ajanga maongka mangur aser state nung party worker tsüngta 'communication gap' tuluka adok. Tiri nisung ka kisüngi yimsü asüba yimya amshiba ajanga lokti aintsü nukla mangur aser party züngsemtem tejangraba aser teimla tatem kati arudaksü, ta pai ashi.

Mapang tatsüka lir Rotokha den party worker tem LJP nung aden, kong parnok ya LJP national Yuva tir Pranab Kumar aser LJP state party lenirtemi pelashishia agizüka liasü.

Aruya aliba Nagaland state assembly elections atema LJP

pur ticket alemba sentong ya February 04, 2023 nü Dimapur nung agitsü, kong election nung tokteptsü jangrar 24 nem party ticket agütsütsü.

JDU national secretary Afaque Ahmad Khan-i sangdong ka nung Kitoho S Rotokha ya party anema inyaksangshiba mechi party nungi meindoker, ta ashi aser Nagaland nung JDU tenüng menüksüba asoshi tapet temerenshi agütsütsü, ta metetdaksü.

JDU Nagaland ya NSN Lotha, Hatpha Wang aser Imsumongba Ponger aser dangartemi anir lir.

### Longleng nung Expenditure Observer den senden amen

**Dimapur, Tsüklai/February 03 (TYO):** Longleng district kübok 49 Tamlu A/C aser 50 Longleng A/C atema Expenditure Observer (EO), Aditya Kamalakar Somkumar-i Election Expenditure Monitoring (EEM) kübok tenteta aliba teams/cells ajunga den shisadokden senden ka February 1, 2023 nü DPDB Hall, Longleng nung mena liasü.

Expenditure Observer ajanga EED kübok tenteta aliba team/cell shia dang parnok shilem aser teinyaksü mapa tem angatetdaksü aser video surveillance team dang Model Code of Conduct nung aibelenba aputsü asoshi election

mapang jembiba recording junga anepalua ayutsü ashi.

Kaket mapa ajak kanga tongtipang lir anungji team temi record shidak ayutsüla aser Commission ajanga tuyuba ama mapang shidak nung osang agütsütsüla, ta ashi.

Aditya-i parnok dang Election Commission of India ajanga tuyuba aser guidelines tem junga azüngtsü aser election takok ngua agitettsü mechi nungloksüba mapa tem temolung agüja inyaksü ajungshia liasü.

Deputy Commissioner & District Election Officer Longleng, Dharam-i iba senden nung o tatsüka jembidang EEM

team tem dang amalitem akatsü aser pei mapa nung tamakok majurutsü ayongzüka liasü.

Osang ajak kasa tongtipang lir, anungji team shiai anogoshi inyakba osang agütsütsüla, ta pai ashi.

SP Longleng-ia iba senden nung Frying Sqyare aser Static Surveillance Team tem indang shilem tejangja ashi. Laisa election temzüng indang Acts aser Representatives balala indang nungi jembia liasü.

Iba senden nung team leader tem den FST, SST, VVT, VST, MCMC, Social Media Team aser DLMT nungi züngsem temi EO den sensaksem kaa liasü.




MGHSS Mokokchung nung Polling Officer 2 & 3, Master Trainer atema training round mezüngbuba tenzüker ananü (February 3, 2023) buba nung EVM, VVPAT & sealing amshiyim sayu aser polling personnel tem dang mock poll indang teinyaksü, poll tenzüksü, polling station nung dangari mongui vote agütsütsüba indang sayua liasü.

### SANGDONGER

Onok kibongtemya taoba election nung party balala nung dena aru, saka dang present minister Tongpang Ozukum dak nübor anitsü sempet tajung reprangteta dang nungi pa den NDPP Party nung atentsü ta nübor ajak dang sangdonger.

- 1) Imtiwapang (Chakba)
- 2) Lanutemjen (Chakba)
- 3) Marsashi (Chakba)
- 4) Talinungba (Chakba)
- 5) Tianungsang (Chakba)
- 6) Bursunep (Chakba)
- 7) Yashimeren (Chakba)
- 8) Imtiliba (Chakba)
- 9) Markau (Chakba)
- 10) Imlitangzak (Chakba)
- 11) Imkonglebiang (Chakba)
- 12) Bendangzagur (Chakba)
- 13) Talichuba (Chakba)
- 14) Impuosaba (Chakba)
- 15) Zagurnungsang (Chakba,
- 16) Wapang (President)



### Mkg. nung school-tem nung ketdangsür tekolaktem asüngsashi sentong aka

**Mokokchung, Tsüklai/February 03 (TYO):** Mokokchung School Administrators Meet ta sür Mokokchung nung akaba school-tem nung ketdangsür tekolaktem Metsüben Hotel Mokokchung asüngsashia angazükshiba sentong ka NagaEd teloki ayongzüka kaogo.

Iba sentong nung shisalen tuyur Kevisato Sanyü, Master of Entrepreneurship and innovation, Swinburne University Australia, Academic Evaluation Specialist, RMIT

University, Australia, Founder, NagaEd, Nagaland liasü.

Sanyü-i Naga lima nung shisaliokren nung temelenshi lir ama saka tanga lima jenjang metongteti alibaya Naga nungeri temelung aguja mebushilokba ajanga lir. Shisaliokren nung tangar den tsüngkang medema meotetra alimaji rajang akumtsü aser nübur tepetzük tia ajurutsü, aji asünung tang inyakyim ya melenshia sabang balala nung achaayanga ajungkettsü kangasa nungtaka kumogo ta adenshia aliba shisaliokren nung ketdangsürtem ajungshia jembia.

### AHoD senden February 7 nü amentsü

**Dimapur, Tsüklai/February 03 (TYO):** Home Department, Government of Nagaland ajanga sangdong ka nung ashiba agi, Administrative Heads of Department senden ka February 7, 2023 nikongdang 1:00 ako nungi tenzüka Secretariat Conference Hall nung amentsü.

Iba senden nung taoba senden nung lemteta aliba lepa reprangtsü, NSSB nung direct recruitment atema requisition, Aadhaar enabled Biometric attendance system, mapang shidak nung pension agütsütsü

aser retirement masüdag kaket mapa ajak tembangtsü indang jembitsü.

Maneni PIMS aser ePaybill, Chief Ministers Health Insurance Scheme (CMHIS), 2nd CS Conference, 2023 küm April ita mezüng hopta G20 senden ayongtsü asoshi renemtsü, e-Office aser Chair nungi temelaba agir agenda mashi jembitsü.

Iba senden nung Administrative Heads of Department ajak arua adentsü metetdaksür, ta sangdong ajanga ashi.

### Kohima nung Bicycle Rally ka agitsü

**Dimapur, Tsüklai/February 03 (TYO):** SVEEP Campaign, Kohima district nüngtem nung Bicycle Rally ka Deputy Commissioner & District Election Officer, Kohima ajanga February 4, 2023 anepdang 7:00 ako nungi tenzüka DC Office nungi Raj Bhavan tashinung ayongzüka agitsü.

Iba Rally ya Deputy Commissioner Kohima, Shanavas C, IAS ajanga tenzüksütsü aser Pastor Khrieneiu Metha Peniel CRC, Billy Graham Rd ajanga sarasademtsütsü.

Iba sentong nung shilem agitsü jangra alir ajak pelashishia jaoker, ta sangdong ka ajanga ashi.

**BBC documentary dak sendakba nung SC-i Centre nem notice agütsü**  
**New Delhi, Tsüklani/February 03**  
**(Agencies):** Centre sorkari 2002 kum Gujarat nung rara tulu adokba indang BBC documentary ka nokdangba anema kari temepishiba ken o benokba sülen Supreme Court-i Centre sorkar nem notice ka agütsüo.

Journalist N Ram, Trinamool Congress MP, Mahua Moitra aser temeden atema inyaker lawyer, Prashant Bhushan nungeri temepishiba ken o agütsüba nung ajemdaker Justices- Sanjiv Khanna aser Justice M M Sundresh nati akümba bench-i sorkar aser tangartem nem notice agütsü.

Ajüsüaka Supreme Court-i obendang kecha magütsüi Centre sorkar dang BBC Documentary nokdangtsü atema telemetba agiba osangji tejangja court nem agüjang, ta tuyu.

Tawa BBC-i Gujarat rara dak sendakba "India: The Modi Question" documentary sayaba sülen India sorkari iba documentary links ajak social media nungi agientsü aser nokdangtsü tuyua liasü.

Supreme Court-i maneni April ita nung iba ken o angadangtsü.

Ato kilonser, Narendra Modi Gujarat state nung chief minister inyakba mapang nung 2002 kum Gujarat nung rara tulu adoka nisung 2,000 dak tema asü.

Ministry of External Affairs-ibo, BBC documentary ya tenung menüksütsü nükjidong nung adokba aser tiyazü, ta sangdonga liasü.

Ajüsüaka opposition party temibo Centre sorkari iba documentary nokdangba ya pei tebilemba jembiba temeden anema inyakba lir, ta aitsür.



February 03, 2023 nü bendan sendan aliba mapang Parliament kima Congress MP, Pramod Tiwari den Rajya Sabha MP temi osangbenertem den jembidang tangokba noksa nung angur.

**Jammu & Kashmir kübok Doda District nunga ki aika kaksadar**

**Srinagar, February 03**  
**(Agencies):** Tawa Uttarakhand state kübok Joshimath nung ali anenoka ia ki noklang aika kaksaba sülen tang Jammu & Kashmir kübok Doda district nunga ki aika kaksadar, ta osang ka ajanga metetdaksü.

Osang angazükba agi, sorkar ketdangsertemi district nung ali anenoka aiba aser anentsüh aluba nokdangtsü atema meranga inyakdar.

Doda district kübok Thathri jila nung ki kaksaba ajanga takoksa angurtemji kiyonger mesüra

kinüngertem kidang jenoka lir. Iba tatalokba sülen geologist tem aser district ketdangsertem team kati iba jila semdanga tensa asadangogo.

"December ita nung mezüng Doda district nung ki ka kaksaa liasü. Yashi tashi nung ki trok dang kaksaa liasü saka tangbo ki aika kaksadar. Iba tesem nung ali anenoka idar. Iba tebilemstü nokdangtsü atema sorkari lenmang bushidar," ta Doda district nung Sub Divisional Magistrate (SDM), Athar Amin Zargar-i metetdaksü.

January 29, 2023 nü Jammu & Kashmir nung lokti tentet kati

sorkar dang Jammu & Kashmir nung anentsüh aluba aser ali anenoka aiba nokdangtsü atema asalentong yanglutsüla aser schemes tenzüksüla, ta takhangba agüja liasü.

Chief Secretary, Dr A K Mehta dang temepishiba shidi ka ajanga "Group of Concerned Citizens" (GCC) J&K-i, railway, highway, expressway aser PMGSY project balala atema tenem lima nung arem chipoka ali atuba sülen Jammu & Kashmir tesem balala nung ali anenoka aiba aser anentsüh aluba tebilemstü lemsatapa liasü.



February 03, 2023 nü Chennai nung Tamil Nadu Chief Minister aser DMK Tir, MK Stalin leniba nung sorkar pusemertemi taoba mapang Tamil Nadu Chief Minister, C N Annadurai nem akhüm agüja jajaba noksa nung angur.

**State Bank of India**  
 STRESSED ASSETS RECOVERY BRANCH, JORHAT  
 Na-Ali, M G Road, Jorhat, Opp. ASEB Building, PIN-785001 (Assam)  
 Tel No : 0376-2300193 / 2300204

[Rule - 8(1)]  
**KIOJEN AGIBA NOTICE**  
 Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsunglanglen sign süa aliba State Bank of India officer-i 30.03.2021 anogo nung Demand Notice ka ajanga sen apur **Mrs. K. Apila Yeptho aser Shri Ramesh Kumar Lakhota, Partners of M/s. Renomme Coir Industries aser Mr. H. Khehovi Yeptho, Guarantor of M/s. Renomme Coir** dang notice anguba anogo nungi tenzüka anogo 60 tsungda notice nung shia aliba sen 7,05,35,522.00 (Rupees Seven Crores Five Lacs Thirty Five Thousands Five Hundred Twenty Two only) agüjang, ta tuyua liasü.

Ajüsüaka sen apuri senji magütsüet nung sen apur/Guarantor aser nüburtem dang tsunglanglen sign süa aliri iba Act kübok Section 13(4) aser Rule 8 nung agüja aliba tashi amshia 2023 kum January 30 nü tsunglanglen shia aliba kiojen agiadokogo, ta sangdonger.

Sen apur/Guarantor aser nüburtem dang iba kiojen dak sendakba nung kechia inyangshahi masütsü metetdaksür aser kari danga tetuyuba anema inyakra State Bank of India-i sen 7,05,35,522.00 den 31.03.2021 anogo nungi tenzüka tetemlok meshitsü.

Sen apur dang iba Act nung Section 13 kübok sub-section (8) nung aliba ama mapang shidak nung item kiojen alangzüksü atema inyangtsü metetdaksür.

**Kiojen osang tejangja:**  
 Block No: Thilixu Village (N/C), Mouza No: 3, Dimapur, Nagaland nung Mrs. Apila K. Yeptho tenung nung aliba Patta No-17, Dag No.-5 vide Allotment Order No: VLS-29/72-D/p/670-74 dated 11.01.2014, nung 4 Bigha 3 Katha 10 Lechas kimong aser RCC nung aliba kiojen ajak.

Bounded:  
 On the North by : Road, On the South by : Samuel Sema,  
 On the East by : Mr Khohovi Yeptho, On the West by : Singrijan Road.

DATE : 30.01.2023 AUTHORIZED Officer  
 PLACE : Dimapur (State Bank of India, SARB Jorhat Branch)

**State Bank of India**  
 STRESSED ASSETS RECOVERY BRANCH, JORHAT  
 Na-Ali, M G Road, Jorhat, Opp. ASEB Building, PIN-785001 (Assam)  
 Tel No : 0376-2300193 / 2300204

[Rule - 8(1)]  
**KIOJEN AGIBA NOTICE**  
 Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsunglanglen sign süa aliba State Bank of India officer-i 30.03.2021 anogo nung Demand Notice ka ajanga sen apurtem- **Smt. Kanili Sumi aser Mr. Akato Sumi, Directors of M/s. S. K. Autokraft Private Limited** dang notice agütsüba anogo nungi anogo 60 tsungda notice nung shia aliba sen 5,38,65,063.30 (Rupees Five Crores Thirty Eight Lacs Sixty Five Thousands Sixty Three and Paise Thirty only) agüjang, ta tuyua liasü.

Ajüsüaka sen apuri senji magütsüet nung sen apur/Guarantor aser nüburtem dang tsunglanglen sign süa aliri iba Act kübok Section 13(4) aser Rule 8 nung agüja aliba tashi amshia 2023 kum January 30 nü tsunglanglen shia aliba kiojen agiadokogo, ta sangdonger.

Sen apur/Guarantor aser nüburtem dang iba kiojen dak sendakba nung kechia inyangshahi masütsü metetdaksür aser kari danga tetuyuba anema inyakra State Bank of India-i sen 5,38,65,063.30 den 31.03.2021 anogo nungi tenzüka tetemlok meshitsü.

Sen apur dang iba Act nung Section 13 kübok sub-section (8) nung aliba ama mapang shidak nung item kiojen alangzüksü atema inyangtsü metetdaksür.

**Kiojen osang tejangja:**  
 1. Block No: 8, Mouza No:3, Village-Signal Angami, Dimapur, Nagaland nung Mr Akato Sumi tenung nung aliba Patta No-1000, Dag No- 60/1105 (Allotment Order No-Rev-15/2003-D/p/16572-75 dated 15.10.2012) nung 01 Bigha-00 Katha 12 Lechas aser RCC building(s) nung aliba kiojen ajak.

Bounded:  
 On the North by: Catholic Prayer, On the South by: Philip Zeiang,  
 On the East by : Road leading to Colony, On the West by : Hopson Pochier.

DATE : 30.01.2023 AUTHORIZED Officer  
 PLACE : Dimapur (State Bank of India, SARB Jorhat Branch)

**State Bank of India**  
 STRESSED ASSETS RECOVERY BRANCH, JORHAT  
 Na-Ali, M G Road, Jorhat, Opp. ASEB Building, PIN-785001 (Assam)  
 Tel No : 0376-2300193 / 2300204

[Rule - 8(1)]  
**KIOJEN AGIBA NOTICE**  
 Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsunglanglen sign süa aliba State Bank of India officer-i 30.03.2021 anogo nung Demand Notice ka ajanga sen apur **Shri Khehovi Yeptho aser Shri Ramesh Kumar Lakhota, Partners of M/s Kivi Foam Industries aser Mrs. K Apila Yeptho, Guarantor of M/s Kivi Foam Industries** dang notice anguba anogo nungi tenzüka anogo 60 tsungda sen 6,77,89,622.52 (Rupees Six Crores Seventy Seven Lacs Eighty Nine Thousands Six Hundred Twenty Two and Paise Fifty Two only) agüjang, ta tuyua liasü.

Ajüsüaka sen apuri senji magütsüet nung sen apur/Guarantor aser nüburtem dang tsunglanglen sign süa aliri iba Act kübok Section 13(4) aser Rule 8 nung agüja aliba tashi amshia 2023 kum January 30 nü tsunglanglen shia aliba kiojen agiadokogo, ta sangdonger.

Sen apur/Guarantor aser nüburtem dang iba kiojen dak sendakba nung kechia inyangshahi masütsü metetdaksür aser kari danga tetuyuba anema inyakra State Bank of India-i sen 6,77,89,622.52 den 31.03.2021 anogo nungi tenzüka tetemlok meshitsü.

Sen apur dang iba Act nung Section 13 kübok sub-section (8) nung aliba ama mapang shidak nung item kiojen alangzüksü atema inyangtsü metetdaksür.

**Kiojen osang tejangja:**  
 Dimapur Mouza 3, Block: Thilixu Village (NC) located at Village- Thilixu, Dimapur, Nagaland nung Mr H Khehovi Yeptho tenung nung aliba (Final Mutation No: 1259/09/5529-30 dated 31.08.2009) Patta No-17/35, Dag No.-5(B) vide Registered Gift Deed No-712/09 dated 02.07.2009 nung 1 Bigha 1 Katha 19 Lechas kimong aser RCC building nung aliba kiojen ajak.

Bounded:  
 On the North by : Land of Khutovi,  
 On the South by : Land of the Donor (Smt. K Apila Yeptho),  
 On the East by : Land of the Donor,  
 On the West by : Land of Nitovi.

DATE : 30.01.2023 AUTHORIZED Officer  
 PLACE : Dimapur (State Bank of India, SARB Jorhat Branch)

**State Bank of India**  
 STRESSED ASSETS RECOVERY BRANCH, JORHAT  
 Na-Ali, M G Road, Jorhat, Opp. ASEB Building, PIN-785001 (Assam)  
 Tel No : 0376-2300193 / 2300204

[Rule - 8(1)]  
**KIOJEN AGIBA NOTICE**  
 Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsunglanglen sign süa aliba State Bank of India officer-i 30.03.2021 anogo nung Demand Notice ka ajanga sen apur **Smt. Kanili Sumi, Proprietor of M/s. S. K. Motors aser Mr. Akato Sumi & Mrs. Hukali Awomi, Guarantor of M/s. S. K. Motors** dang notice anguba anogo nungi tenzüka anogo 60 tsungda notice nung shia aliba sen 2,38,02,272.00 (Rupees Two Crores Thirty Eight Lacs Two Thousands Two Hundred Seventy Two only) agüjang, ta tuyua liasü.

Ajüsüaka sen apuri senji magütsüet nung sen apur/Guarantor aser nüburtem dang tsunglanglen sign süa aliri iba Act kübok Section 13(4) aser Rule 8 nung agüja aliba tashi amshia 2023 kum January 30 nü tsunglanglen shia aliba kiojen agiadokogo, ta sangdonger.

Sen apur/Guarantor aser nüburtem dang iba kiojen dak sendakba nung kechia inyangshahi masütsü metetdaksür aser kari danga tetuyuba anema inyakra State Bank of India-i sen 2,38,02,272.00 den 31.03.2021 anogo nungi tenzüka tetemlok meshitsü.

Sen apur dang iba Act nung Section 13 kübok sub-section (8) nung aliba ama mapang shidak nung item kiojen alangzüksü atema inyangtsü metetdaksür.

**Aienshitelba kiojen/osettsüset:**  
 Renault Duster RxZ 110 ps, Registration No: NL07-H-0195,  
 Engine No- K9KJ886D033151, VIN No: MEEHSRA36E1032483

**Kiojen osang tejangja:**  
 1. Y Zhimo Colony, Dimapur, Nagaland nung Smt. Kanili Sumi tenung nung aliba Patta No-819 Dag No-924, Block No:8, Mouza No-3, Sale Deed No: SD-2129/10 dated 28.09.2010 nung ayimjemba kimong tasazük 1 Katha 4.5 Lecha aser RCC building(s) nung aliba ajak.

Boundary: **North:** Tokhio Sema, **South:** Colony Road, **East:** Tokhio Sema, **West:** Xukiye Chisi.

2. Purna Bazar (New Colony), Dimapur, Nagaland nung Mrs Hukali Awomi tenung nung aliba Patta No-236 Dag No-256, Block No:2, Mouza No:2 nung Sale Deed No: SD-3208/13 dated 20.11.2013 agi ayimjemba kimong tasazük 2 Katha 10 Lecha aser RCC building(s) nung aliba ajak.

Boundary: **North:** Colony Road, **South:** G Kiba, **East:** Colony Road, **West:** Tokavi Awomi.

3. Village Diphupar, Dimapur, Nagaland nung Mr. Akato Sumi tenung nung aliba Patta No-108 Dag No-11/163, Block: Diphupar, Mouza No-3 nung Sale Deed No: SD-381/13 dated 07.05.2013 agi ayimjemba kimong tasazük 1 Katha 9 Lecha aser RCC building(s) nung aliba ajak.

Boundary: **North:** Approach, **South:** Lotha Baptist Fellowship, **East:** Hutoni Sumi, **West:** N. Lotha.

DATE : 30.01.2023 AUTHORIZED Officer  
 PLACE : Dimapur (State Bank of India, SARB Jorhat Branch)



## TIR YIMYIM YIMOBILEM (EDITORIAL)

DIMAPUR

KÜPTOKNÜ,

TSÜKLAI 04, 2023

### Taküm Election onüka kechi ?

**C**enter aser state nung yimsü tesüdak yimten telok tenüng nung election-i aitsü raktepba nung kecha tesüngmangtsü mali, kechiyong yimsü tesüdak purtem ket nung dang nüngdak ajak peria angutsü ta nisungtemi angatetter. Ajisüaka, shitakba yimten nung tangatettertemibo tang shirnoki yimsü asür aser ano shirnoki election nung takok ngua yimsü asütsüla ta asüba tsütsüji masü saka koba yimten telok südir süaka, parnok telok nükjidongji kechi aser election mapang nübortem den kechi onük jembir ta asübajiang tongtibangsa agir. Aji oda, Nagaland nunga February 27 nü agitsüba election asoshi yimten telok shia party ticket alemba mapatem tanü tashi nungbo temadoktsü aser election nung tokteptsü atema tenüng agütsürbo, joko, nübortem ajurua pei telok mesüra pei kija nükjidong aser tebilemba lemsatepa jajatsü. Iba mapangji candidate-i kechi onük jembia jajatsü ta asübaji kanga tongtibang lir. Atangji, asen lima nungbo tesem aika nung nübortemi candidate-temi kechi onük jembia arur ta asübaji tebilema mebilemtsüa akok, kechiyong asenok asoshibo senso candidate, sen aser mapa meinyaki ita sen chia alitsü atema tatidang kecha magütsüi angati government mapa tilaka angur asü mangur ta asüba onüktem dang tongtibang akümer. Aji oda, assembly nung amensangji asen yimer süra ojang, ano election temerbo kecha nüngdak maliji election mapang candidate-bai vote melen sen agütsüra ojang ta bilemba shisatsü aser tangatetba agidang asenoki asenoki election nung shilem agiba agi, election mapang candidate-temi asenok den kecha tagitsü o mejembir aser election sülen inyaka aotsüba mangdang aser nükjidonga kecha melemsateper. Aji oda, election-i aierem rongnunga, ashiko, nisung aika mulungjang nung nübortem asoshi tajung inyaksütsüba bilema malitsü, anungji election mapang nübortem den kechi jembitsü ta shisabolur masü saka nübortem nem sen kwi agütsütsü ta asüba shisabolujang tuluba ser election nung toktepa alitsü. Ashi, candidate-temi mejembiyonga nübortemi candidate-tem dang sen masü aser mapaa masü saka pa mesüra la election-i aiba nükjidong asüngdang nungbo, iba kisüng jagi asen lima tajungba küma renlokla. Aji oda, election mapang candidate nem light tajungba yoktsü nangzükdaksü asübo asenok lanurtem aika light tashi amshia business mapa aika inyaktettsü. Kasaji, pei vote sen tera yong ayoktsü melen candidate nem government mozü ki shitak anepalutsütsü nangzükdaksü asübo, election temer asenok shiranga bendanglen senzüdang alikimong dena yoka jajar tasü mang bener marula. Kasaji, election mapang asenok alidak government school ajak shitak anepalutsütsü nangzükdaksü asübo asenok chirnurtem private school nung fees magütsütet timtem maksü majurula aser tanurtema zünpeter manenla. Atangji, tang election nung yimten telok ajaki ano khen bangpetsa Naga yimten tebilemtsü koktettsü atema onük tapu balala jembitsü aser lanurtem asoshi mapa adokdaksütsü indanga jembitsüa akok, ajisüaka item o nungji nübortemi tamanga mamangtsü aser tangaa mangatsü. Iba jagi asen lima nung election mapang lokti senden lia alima ajungtsü atema onük benoka jembiba mangu aser mangashi election aika süir. Joko, asenokia kidang mener tangar lima tejakleni aoba angur asünungji, election mapang ya senso candidate aser sen otsü ya masü saka asen lima nunga kodaser lanurtemi technology tapu balala amshia alu ayimtsü, chiyongtsü yanglutsü aser tagitsü rongsen adokdaksütsü ta asüba onüktemang election senden nung tepboka jembitsüla. Itemji jembitsü candidate-tema jaoktsüla aser candidate-tema election-i aiba nükjidongtemji itemji asütsüla. Election mapang ya sen melenba mapang masü saka candidate o nübortem na tsüngda tarutsü mangdang aser inyaka aotsüba sentong lemsatepba mapang tajung ka lir ta angateta inyakdi.

## OLEMSABANG

### Nü temeden meyongnem sen yong teyok

Mrs. R. Mapukala Pongen  
Merangmen, Tzurangkong

Temolunga shimaker, ola-a matokteter, pangkaseter.

Anogo ishika tsüngda nübortem yimya ngur.

"NAGALAND FOR CHRIST" Yimyim denbo kenyongi mapet.

Akseter, nüma-a matanger, ya Khristan nübortem tu na...

Election sen agi masü-tashi chiyonga alitsü amato,

Telok telok kümteter kolen nongzüteper ya !!

Putir nungi kinü tanur tebang nungia LAKH... LAKH...

Ya-a ma... süjia odi asür, Khristan ayak den yabo meputepka.

Nübor asoshi ni shimtetang ta ola atokertemji,

Ajakbo takar, tulur masü, alima asoshi timtemtsü tenzüker.

Parnok ket nung sen menüngba KOL malitsü.

Ali telong nungi sen metutettsü, süngdong nung sen maonger.

Tarutsü nübor asoshi lenir tajung ta aseni reprangtetra,

Angati meyongnem kaji pa mesüra la nem magütsütsü no?

Lenir kidang tzü marok kata mejemtsü-i, parnok shimtetra koda!

Takar, tuluribo nür akaba nungi mokoru-i tenla nung "KOMA".

Minister, MLA tem ajak auer ta jembir kichiba !

Pa atoker külen pai nangzükba ama meinyaker, "Shidak".

Terenlok agütsüba sen nungi meyimzüka ayubaji,

Makoktsü nangzük ta nemnembaji Oh.... Nong ni...

Sen meshir onsara magütsüra vote maka... tetemlok nung sen apur.

Iba sentsüji kong nungi aotsü! Jogo alima terenlok sen nungi,

Tia maka tamakok ngura pei aliba ki tena yokdoker, Ayatai!

Meshimetsür jenjangi ludaktsür, Ya shiba tai, NAGA NUNGERTEM!

Nübori sen memeshi-i atokdaktsülasang, jembitsü temeden aika lir.

Ochishia shimteter yazüra, Pa jenjang kichia maka.

Nübor memeimra, semchir tashi yimli makatsü.

Aseni sen yong vote meyoklasang, lenir-ji auer mekümla.

Aya-a... kari crore ... kari lakh... kari gari..

Asen atema timtemdi ta asünung, kuret tulu benloktsür masü no.

Sen meimbaji temenen ajak tera, tendangang election sülen,

Angati anguba rongsenji, meyimlaba timtem aser tashidak nung

indoktsü.

Arung, Yimden yimsüsür, arogo tenzüker, Lanu laji ajungai,

Lenirtem asoshi sarasadem tenzükti.

Tsüngrem meimba, nübor meimba lenir tajung kua ta shidi.

Tila kümtetba, asüküm maket, ochishir shimtetang ta ayimtendi.

Tsüngremi molungba yimsüsüri yimsüsüra nübortem mepelalima?

Lokti asoshi, alima asoshi terenlok bener arutetba lenir shimtsü,

Kibong ajungai Tsüngremi molungba lenir aginür ta,

Ola matoki ajemalua temeden süngden anasa pai nü teka amshitsü.

"NÜ TEMEDEN MEYONGNEM SEN YONG MEYOKI

OCHI NUNG AGÜJANG"

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazüngerer angateta agitsü mepishir

# IRF Roundtable Pakistan-i IRF Summit Co-Chair, Dr. Katrina ajuru



January 31, 2023 nü Washington, D.C nung International Religious Freedom senden nung IRF Summit 2023 co-chair, Sam Brownback-i jembidang tangokba noksa nung angur.

**Washington D.C, February 03 (Agencies):** Washington D.C nung IRF senden aliba mapang nung IRF Roundtable Chair for Pakistan, Anila Ali leniba nung Pakistan IRF Roundtable nungi telok kati IRF Summit Co-Chair aser Lantos Foundation for Human Rights Tir, Dr. Katrina Lantos Swett ajurua senden menogo.

Iba senden nungji Pakistan kübok Karachi aser Lahore yimti na nungi Roundtable züngsemtem aden. Lahore

nungi Khristan lenir, James Channon aser Karachi nungi Khristan lenir, Dr. Seemab Asif nata iba senden nungji aden.

Senden nungji meimchir temeden atema inyaker aser minorities temeden atema inyaker, Muhammad Kashif Mirza-ia jembia liasü.

Roundtables ajanga minorities, lokti tentettem, yimsü lenirtem aser sorkar longjemdaksür tebilemtsü balala atema inyaker aser kati ka dak tamang katetba jenjang

ajungkettsür, ta parnoki bangjema liasü.

Parnokisa, Pakistan nung tayongzükba balala aliba mapang nung Anila Ali-i meranga inyakba ajanga Roundtables tentetba atema la nem tetushi agütsü.

IRF Roundtable Pakistan chair, Anila Ali-i IRF Breakout senden mapang nung jembidang Pakistan nung International Religious Freedom ajungkettsütsü atema ayongzüka liasü.

# Pope Francis-i South Sudan semdangtsü lia nisung 27 tepset

**Tsüklai/February 03, 2023:** Pope Francis-i South Sudan semdangtsü anogo ka dang lia Brihostibarnü South Sudan kübok Central Equatoria state nung shiruru mesürtem aser telungpur telok ka na tsüingda rara adoka nisung 27 tashi tepsetogo.

Pope Francis-i Democratic Republic of the Congo (DRC) semdangba sülen Hokolbar nungi Amongnü tashi South Sudan semdang.

2013 nungi 2018 küm tashi South Sudan nung civil war aliba sülen 2018 küm telok balala tsüingda yimjung tezüngzüktep agiba ajanga linük nung rara kanga ajema kümogo, ajisüaka telok balala tsüingda tilateri rarabo manener.

Telungpur telok kati shiruru mesürtem nisung trok tepsetba

sülen rara adoka liasü. Brihostibarnü shiruru mesürtemia mangyangba mapang nung tanur pongu aser mashisa tetsür ka densema civilian 21 tepset, ta Kajo-Keji county commissioner, Phaniel Dumo-i metetdaksü.

Archbishop of Canterbury Justin Welby-i Pope Francis meina South Sudan-i ogo.

Justin Welby-i, "Iba tatalokba ajanga ni aoksar. South Sudan tesem ajungalen item ama tatalokba osang ya mapang shia angashir. Ni South Sudan dang yimjung atema ajak longjemtsü ayongzükter," ta metetdaksü.

Pope Francis-i Congo nung tesüsa linük yimtiba, Kinshasa nung putirtem ajurua liasü aser airport nung tatemsa sentong ka agia liasü.

Congo aser South Sudan nung tesüiba küm aika rara aruba manener, anungji linük ana nung ya tesünep alitsü nükjidong nung arrshi küm 86, Pope Francis-i linük anaji semdang.

Bodhbarnü Pope Francis-i anüdoklen Congo semdanga rara ajanga takoksa angurtem ajurua liasü. Pope-i South Sudan semdangba mapang nung pa den Global Anglican Communion lenir Welby aser general assembly of the Church of Scotland moderator, Iain Greenshields na alitsü.

Francis-i Khristan nütsüng teimba aliba South Sudan linük semdangtsü aiben sentong yanglua liasü saka rara aliba, tensa majungba aser pa temang manemba agi aiben thinena aruogo.

# ICC-i Turkey nung bendanger Protestant Khristan lenirtem yarir

**February 03, 2023:** Turkey linük nung sorkar ketdangsertem aser MIT (state intelligence agency of Turkey)-i maneni linük nung bendanger Protestant Khristanem nem N-82 codes agütsür, aser ibaji bendangertem linük telungi aitba nokdangtsü atema lir, ta International Christian Concern (ICC)-i metetdaksü.

Taoba ita ICC lenirtem nem notice ka agütsüba sülen MIT kübok bendanger Khristan lenirtem nem N-82 agüja pua

ayuba aser linük nungi meyipa yoktsü atema tetuyuba agütsüba anema ICC lenirtemi ken o benoktsü atema inyakdar. Item Khristanemji küm aika tejaklen nungi Turkey nung alir aser linük nung telidak lia N-82 agütsü.

2019 nungi 2021 küm tashi nung bendanger Protestant Khristan 68 nem N-82 agütsüogo, ta International Christian Concern-i metetdaksü.

Turkey nung Protestant Arogo 186 shi nung bendanger

Protestant Arogo nungi lenirtemi tongti shilem agia arudar; talisa Turkey nung pastoral & theological vocational training agiba mapang nung parnoki tongti shilem agir.

2021 küm nunga N-82 tetuyuba agientsü atema International Christian Concern-i yaria ken o aika benoka takok nguogo aser ibaji ajanga 2022 küm nung bendanger protestant Khristan aika linük nung maneni alitsü temeden angu.

# ANOGO ABEN TSÜNGREM DEN

## Tashi angaba nungi lesson ka

*"Pa tetsü kilirtem dang ashi, kechisa pai nenok dang shidir, aji inyakang"- Yohan 2:5*

Iba o ya Kana yimdak Kiyir benjung ka Yisu tetsüi Pa nütsüngtem dang ashiba o lir. Kiyir benjung nung chiyongtsü agi mepiri, benjung Kibur koda masüba tia ka nung liasü. Benjung jazüker chiyongtsü agi mepiriba kibur asoshi koda maksü ! Iba tia nung Yisu tetsüi nütsüngtem dang Yisui ashiba ajak inyaksü ashi.

Tetsü kati ashiba o nungji mapa asem reprangdangdi : Tashi angabaji rangpen, kecha anünga meyui, "Pai kechisa shidir." Yangi anünga mayutsü indang jembir. Tanabuba, tashi angaba talila kecha matentsüla; kechiaser pai kechisa shidir asenoki inyaksüla. Pai mulungba ama, mesüra meinyaksüla. Tasembuba, aseni tashi angabaji tejangja asütsüla: "Pai ne dang kechisa shidir, inyakang"; Pai ashiba mesüktepa masü, mesüra Pa den kasa mapa ka masü; saka Pai ashiba.

Kana yimdak kilirtemi inyakba noksa asem angur. Idangyongjisa parnoki Pai ashiba ama tashi anga, tekong 7 jagi sayur. Parnoki abensaa tashi anga. Tzü moriji sünga tzü inok. Pai kechisa ashi parnoki takok ngua inyak- "tebang metema inok", "tatet," "bener aru."

Iba tashi angaba nungi mapa asem adoka liasü (1) Tsüngremi mapa inyak; (2) tesüngmangtsü ka melenshi, kechiaser lokti koda mesüi timtema alidang tematiba tepela agütsü; (3) tetezü akaba jungkai adok, kechiaser ya zülua lir, "Pa temaitsü mapatem tenzükba ya Yisui Galil nung aliba Kana yimdak inyak, aser Pa sentsüwangshi jungkai adokdaksü, aser Pa nütsüngtemi Pa dak amang."

Asenok rongnung lanurtem den iba o koda jembitsü. Lanurtem tarutsü jenjang shimtsübaji ne dak aket; iba o ya ne taküm azüokba motto südakjang: "Kechisa Pai ne dang shidir aji inyakang." Iba motto jagi temeim, aniasüngba, kibong talentep azüokdakjang. Tanelaren nungi kodang Yisu satidak mali asü yi temadok; saka kodang Pa tongti tejaoker aküm, Pai tzü agi yi tajungtiba kümdaktsü, asen meimchir tashi mait temeim tepela agi sünga kümdaktsü koba kotak menakdangba tetezü liasü.

Iba mapa nung Maryi tetsü shilem agi, "Pai kechisa shidir aji nenoki inyakang." Tetsütem ajaki pei tanur dang kasa oji shitettsüla. Küm tasen tenzükdang, "Pai kechisa shidir aji tashi angaa inyakang" motto yur tenzükdi.

# Yirusalem nung Yisu kürakyanglu raksatsür America nunger ka apu

**February 03, 2023:** Yirusalem nung aliba Tenla ki ka nung America nunger raliwalir kati Yisu kürakyanglu raksatsüba atema puogo.

Israel police-i ashiba agi, Yirusalem kübok Via Dolorosa nung aliba Roman Catholic Arogo Church of the Flagellation Tenla kidang America nunger kati Yisu kürakyanglu raksatsü.

'Via Dolorosa' ya Yisu Kangki nung angenloksü atema Pa jajaba lenmang lir, ta amanger.

America nunger kati Yisu kürakyanglu Tenla kidang raksatsüba video ji social media nung kanga prokshigo. Nisungba jagi yamai ashir, "Yirusalem nung nenoki süngyanglu ayutsü makok; iba ya temeshi yimti."

Israel police-i sangdong ka ajanga, "Tamangba yimsü rejutem aser tesemtem

raksatsübaji onoki süoki ia agir. Yimsü ajak indang temeshi tesemtem raksatsüba nokdangtsü atema police-i maneni inyaksü," ta metetdaksü.

Dormition Abbey nung putir, Nikodemus Schnabel-i, iba tatalokba yimya ya tang aliba sorkar mesüka lir, ta aitsü.

Paisa twitter ajanga, "Khristan sempapa tasen Israel-i jaoker; iba ya tang aliba sorkari ajungmesor aser nungiter," ta metetdaksü.

Tawa Israel sepaitemi West Bank nung refugee camp ka mita oa liasü aser iba mapang nungji arrshi küm 61 tantsür ka densema Palestine nunger 10 tepset.

Palestine nungeria anüdoklen Yirusalem nung synagogue anasa tesem ka amakdang arrshi küm 14 tebur chanu ka densema nisung tenet tepseta liasü.

**AO OSHI ANGAZÜKDAK: TANÜ ANGAZÜKTSÜBA OJANG**



**Osemlok**

(n) tangari züluba kaket indang o kar zülusemstsüba (foreword)  
\* Kaket azünger osemlok tama azünger.

**Osen**

(n) o melamelaa angazükba tobur tajung ozü tapu ka (mynah)  
\* Tanü asüngbo osen ozü senzüa mangur.

**OLONG PAITEP # 6418**

Grid for crossword puzzle #6418 with numbered starting points.

**TIPIEN**

- 3. Telunglen masü - (4)
5. Tanü-asüng - (4)
7. Külem - (4)
8. Tetsüngi ao - (4)
9. Tinen - (3)
10. Tsük achiba ozü ka - (3)
13. Jara atakba aou - (3)
14. Atangji nung - (9)
15. Alima toktsür ao - (3)
16. Teimla ayuba - (3)
18. Ola tashi-i adok - (3)
20. Sen yong agütsü - (4)
21. Te \_\_\_\_\_ sü - (4)
23. Zübo aket - (4)
24. T \_\_\_\_\_ ok - (4)

**LANGTSÜNGLEN**

- 1. Aso-ajen tasazük - (3)
2. Nisan - (4)
3. Tatutsü - (4)
4. Süng rongtemer anüngba - (6)
5. Mapa melena anguba - (3)
6. Jang asepbba - (6)
11. Mit adok - (4)
12. Tebang nung enok - (4)
13. Kecha taa meli-i - (6)
14. Tasür alidak - (6)
16. T \_\_\_\_\_ sa - (4)
17. Menden nung anisüngzük - (4)
19. Tsünüsembongdak - (3)
22. Tepok tazüng - (3)

**OLONG PAITEP # 6417 TELANGZÜBA**

**TIPIEN :**

- 1. Telok, 4. Aluru, 6. Ozüng,
8. Emk, 9. Kin, 10. Teti,
12. Süir, 13. Jen, 14. Ola,
16. Talak, 17. Mazük.

**LANGTSÜNGLEN :**

- 1. Tenükjang, 2. Luden,
3. Kiochtsü, 5. Lenti,
7. Tajangzük, 11. Teronem,
12. Sempa, 13. Jahaz.

**NAI-A YA METETTER MA**



**Robert Wadlow : Alima nung Tar talangtisang**

Alima otsü nung tar talangtibaji America nung Robert Wadlow liasü. Pa tar tasazükji feet 8 ser inch 11.1 aser temang touzükji seret 200 shi liasü. Pa 1918 küm February 22 nü aso aser 1940 küm July 15 nü arishi küm 22 nung asü.

**TIPRA Motha-i Tripura nung sorkar akümtsü makok: Assam CM**



Agartala, February 3, 2023 (Agencies): Tripura nungertemi TIPRA Motha nem vote meinoktsüsüla kechiyong parnoki sorkar mekümtettsü ta Assam Chief Minister aser NEDA convener Himanta Biswa Sarma-i tanü ashi.

Khowai district kübok Krishnapur Assembly Constituency BJP Janajati

nung mali nung kodaer mapa inyaktettsü? Tipra Motha nem vote enoktsüba aser meinoktsübaji kasa dang" ta paisa ashi.

"Parnoki state ya party ana kuma lemsanür. Onoki lisopurtem shisaliok aser mapa atema inyaktsü. Tripura ya state ka dang asütsü aser onoki Tripura renloktsü atema inyaktsü" ta Sarma-isa ashi.

"Tripura ya telungpurtem aser ozüng alema inyaksangshi agi sünga aliba state ka liasü saka tangbo yimjung, terenlok aser azükaru state ka kümogo" ta Hokolbarnü BJP national president JP Nadda-ia ashi.

Nadda ya tanep Tripura tonga aru aser pai lokti sentong ana nung aden.

Vijay Sankalp Rally ajanga nüboyimba maparen tenzütsü maongka angu aser tanü nübortem adenshiba angudang BJP-i ano taruba sorkar akümtsü lemtetogo ta ajiteter, ta Nadda-isa ashi.

**Meghalaya elections atema CAPF indang company 40 aruogo**

Shillong, February 3, 2023 (Agencies): Meghalaya nung election mapa atema central armed paramilitary forces (CAPF) company 40 jungnüa aruogo.

Meghalaya indang company 120 lemzükja lir ta Meghalaya chief election officer (CEO) FR Kharkongor-i ashi.

Tripura nung February 16 nü polling agiba sülen tanüngba CAPF indang

company 80 arutsü ta Meghalaya CEO-isa metetdaksü.

February 27 nü Meghalaya legislative assembly indang election agitsü aser March 2 nü votes azüngtsü.

**Manipur nung acre 3,500 nung poppy alu raksatsüogo**

Imphal, February 3, 2023 (Agencies): Manipur Governor La Ganesan-i 12 buba Manipur Legislative Assembly indang session tasembuba nung o jembidang 2022 küm state sorkari ali acre 3,517 nung poppy alu raksatsüogo ta ashi.

Methamphetamine, Spasmo Proxivon seret 2,384 tema puogo aser aketdang ajemba mozü pongdang 40,000 tashi puogo, ta paisa metetdaksü.

Yaküm ND&PS Act kübok ken o 504 benokogo aser iba nung nisung 32 aitsü aser PIT NDPS Act kübok nisung 84 apu, ta Ganesan-isa ashi.

"Manipur nung tesüiba küm ishika tsüngda law & order tensa tajungba kümogo" ta paisa ashi.

"Iba ajanga district 6 kübok police station 15 nungi Armed Forces Special Powers Act agienogo. Iba ya April 1, 2022 nungi tenzüka liasü" ta Manipur Governor-isa metetdaksü.

"India sorkari Indo-

2022 küm Manipur nung ozüng alema shibelenba mozü seret 2,567 apu ta paisa ashi.

"Sorkari 'War on Drugs 2.0 kübok ozüng alema shilebelenba mozü aser lanurtem kümzüksü atema mapa inyaker" ta Governor Ganesan-i ashi.

State sorkari war on drugs campaign maneni inyakdang Heroin, Brown Sugar, Opium, Amphetamine, Ganja,

Myanmar international arrtsülen police outposts 34 aser National Highway 37 nung police outposts 6 lapoktsü mulunga agizükogo. Scheme for Special Assistance to States kübok Rs 80.40 crores agüja item mapa inyaktsü. Tang border police outposts 12 aser police outposts 3 teyangludak lir" ta paisa shisem.

2022 küm telungpur 72 temai adok aser 309 apu aser prangpong-injang aika ngutetogo, ta Ganesan-isa ashi.

Central aser state victim compensation scheme tem kübok telungpurtem nungi timtem angur nem teyari agütsüba nung Rs 212 lakh endokogo, ta paisa ashi.



Agartala nung CPI(M)-i Left Front-i Tripura Assembly elections atema manifesto sayadang agiba noksa ka angur.

# Pope Francis-i South Sudan semdangtsü lia azüdokshiba nisung 27 asü

**Juba, Tsüklai/February 03 (Agencies):** Pope Francis-i South Sudan semdangtsü mechi tayang kepzüktepa shiruru metsürtem aser militia züngsemtem tsüngta Central Equatoria state nung azüdokshiba nung nisung 27 süogo.

Iba lendong ya Brehostibarnü atalok, ta yangji alir lenir kati ashi.

Pope ya kidanger Democratic Republic of the Congo (DRC) nungi arutsü lir aser küm ter dak tema kin balala tsüngra rara arudang nisung meyerijang aika takum samatsüba rara tatem kati arutsü nükjidong nung yimjung maparen ka asendenshitsü teimla nung pa arur.

2013 nungi 2018 civil war nung tongtipang party temi yimjung tezüngzüktep ka 2018 nung zülutepba ajanga tawa South Sudan nung azüdokshi kanga ajema kumogo, saka tsükchitep adoka aliba kin tsüngta raratepba teti ataloker.

Telok ka nungi sepaitemi shiruru metsür kin nungi nisung trok tepsetba sülen iba azüdokshi ya tenzüka liasü. Shiruru

metsürtemi Brehostibarnü mangyanga anasa aliba tesem ka nung civilian 21 tepset aser yangji tanur pongu aser mashisa tetsür ka dena liasü, ta Kajo-Keji county commissioner Phaniel Dumo-i ashi.

Archbishop of Canterbury Justin Welby shibai pope meina South Sudan-i aor, paia iba lendong osang angazüka tsübor aser aoksar, ta ashi.

"Iba otsü ya South Sudan nung mapang shia angashir. Ni ano yimya balaka nung ayongzüker: South Sudan atema ajak longjemer yimjung asoshi nokdaksüla," ta pai Twitter nung ashi.

Pope Francis-i temolung shiranga DRC semdangba Hokulbarnü tembang aser aji masüadang pai Kinshasa nung Congolese bishop tem ajuru aser airport nung tepila sentong ka nung dena liasü.

Pa amenba tayimtsü ya anepdang 9:40 ako (par mapang) nung South Sudan yimtiba Juba bushia ayamesotsü lir, kong pa nikongdang 1:00 ako nung atongtsü imlar.

Arishi küm 86 tain Catholic Church nung tekolakba ya 2013 küm nungi putir temaba mapa inyaka aruba mapang sub-Saharan Africa ya asemen buba semdang alitsü, aser linük ana nung küm aika azüdokshiba agi timtem agüja aruba nung yimjung tanaben benokshiba nung yaritsü nükjidong nung senzür.

Bodhbarnü pai DRC anüdoklen rara agi timtema alirtem ajuru, shirnoki kinunger tem tepsetba tenük agi ngua lir aser shi nung medemtsü asoshi alar ama amshi, tetsüng-tepen rangdoksü aser tashiyim amshia nisung shi chidaksü.

Pope-i South Sudan semdanga jajaba ajak nung Welby-i meintsü, shiba alima nung Anglican Communion lenir lir aser ano Church of Scotland indang general assembly nung moderator Iain Greenshields-ia meintsü.

Francis-i Khristanpur timba aliba linük ya küm aika nungi semdangnüa liasü, ajisiaka pai iba sentong yanglu tenzükdang yangji anisüngzüük meliasü aser pa temang mejungi aru.

# US House foreign affairs committee nungi Ilhan Omar anentsü

**Washington, Tsüklai/February 03 (Agencies):** Congresswoman Ilhan Omar-i taoba mapang Israel aitsüba mechi United States Republican temi la House Foreign Affairs Committee nungi anentsüogo aser Democrats temi aitsür.

Vote 218-211 agütsütepa House nung Brehostibarnü pangzüng ka agizüka Omar - Somalia nungi taoba mapang refugee ka ama alila aser Congress nung Muslim tsür ana aliba nungi ka - ya committee mapa nungi agiena liasü.

Omar-i "anti-Semitic" aser "anti-Israel" o jembiba ajanga foreign policy panel nung inyaksü metemsü akum, ta Republican telok nungi ozüng yanglurtemi o atsütepa liasü.

Vote magütsütep dang la ayak mechi Republican temi la dak tenük yoker, ta Omar-i shia liasü.

"Na immigrant ka süra m esüra na alima nung tesem kar nungi süra mesüra sentsü balaka mesüra Muslim nunger

süra nüdak temolung malemtsü. Republican Party züngsemtemi sentsü tanak rongnungi tir mezüngbuba Barack Obama ya 'secret Muslim' ka ta aitsüba ya ajungbena atalokba ka masü," ta Omar-i ashi.

Republican inyakyim agi la manokshitsütsü, ta Omar-i ashi.

Lai maneni tim mesüi raraba, tashiyim amshiba, kin tilatem samatsüba, amokbangba mesüra timtem balala mechi pei talidak ki yutsür prokshiba ajanga timtemer asoshi maneni jembitsü nangzüük.

Committee nungi Omar agienba ya "political stunt" ka aser America nüburtem atema mapa tamajung ka lir, ta White House-i ashi.

"Congresswoman Omar ya akaji akumtsübobba Congress züngsem ka lir. Israel dak sendakba nung lai taoba mapang jembiba atema tatok meshiogo," ta White House odongtar Karine Jean-Pierre-i osangbener dang Brehostibarnü ashi.

American Israel Public Affairs Committee (AIPAC) densema Israel busema yimtenren nung asayar teloktem nungi political donations agütsüba yagu Washington nung Israel yariba nung shilem agir, ta Omar-i 2019 küm ashiba ajanga party ajaki aija liasü. Mapang tatsüka lir la yangji shilem mali ta shia liasü.

Tesüiba küm ana tashi AIPAC aser danga Israel bukumba organisation temi congressional elections nung sen dollar million aika indoka Palestinian human rights busemer tsükdaksütsü yaria aru.

Omar anentsütsü pangzüng renemba ya tayang kepzüka masü saka ochi mapa inyakba lir, ta Republican temi ashir. Democrats temia taoba mapang Republican Congresswoman Marjorie Taylor Greene ya tesüiba mapang mangatetep adoktsüsa, anti-Semitic aser Islamophobic o jembiba mechi 2021 küm la nem nunglokja aliba committee nungi anenja liasü.

# MULUNGNEN O



**Aso: 28.08.1925 - Asü: 29.01.2023**

Onoki teti akümtsüba aser meima aliba asür Anoknaro (Mangmetong), iba lima nungi asen teyanglur Tsüngrem dangi shilanga aoba anogo onok asoshi sarasademja, temeim sayua rongsen, nübu den mapang agüja yariteper ajak dang kinunger tenüng nung pelaba lemsateper.

Nenok mapa tajung asoshi Teyanglur takarsang Tsüngremi maneni mojangta ozü sarasadem teti alitsü.

**Temeim Kinungertem.**



Feb. 03, 2023 : Athens, Greece nung aliba parliament kima drama aser arts school tem nungi kaketshir temi longkak aita jajaba mapang tangokba noksa ka yangi angur. Civil service mapa nung qualification system anema performing artists aser arts students temi ananü buba longkak aiter aser iba mapang theatre tem shibanger, television shoots anena lir aser art school classes nunga timtem ajurur.

# Erdogan-i Turkey nung elections agitsüba anogo sangdongogo

**Istanbul, Tsüklai/February 03 (Agencies):** Turkey tir-i taruba linük parliamentary aser presidential election May 14 nü agitsü ta sangdongogo.

Tir Recep Tayyip Erdogan shiba tanaben tokteptsü atema sentong yanglurdar, pai northwestern Bursa province nung youth conference ka nung shilem agiba mapang iba osang metedakja liasü. Iba sentong indang video ka prokshia liasü.

"Asenok lenmang ajuruteptsüsa tiatsüba atema Tsüngrem dang pelar, shirnok May 14 nü election agiba mapang mezüngbuba vote agütsütsü lir," ta Erdogan-i ashi, shibai taoba hopta election agitsüba anogo indang tebilemdangba ka lemsar liasü.

Bursa nungsa pai, March 10 nü officially osang ka agütsütsü aser iba sülen Turkey indang Supreme Election Council-i election atema renem tenzüksü, ta ashi.

Candidate kati danga vote shilem 50 dak tema mongutetra election tanabuba shilem May 28 nü agitsü.

Erdogan, shiba tamasa 2003 küm Ato Kilonsr asütsü atema shim aser 2014 küm tir mendeni tua liasü, pa atema iba election ya tasaktiba asütsü, kechiyong Turkey tang rongsenketzüng

kanga mejungi kümer lir.

Kasa mapang nung party trok agi kümtetba opposition alliance-i tang tashi tir candidate sangdonga mali. Parliament nung party tulutem rongnung tasembuba pro-Kurdish party, tang tashi shinga dena longjemer mali aser ashiba agi, parnoki party candidate ka yoktsü akok.

Arishi küm 68 tain Erdogan-i 2018 küm inyakyim tasen ka benok aser Ato Kilonsr office agina tashi timbaka tir nem agüja liasü. Tir office ya taoba mapangbo tenüng atema dang liasü. Inyakyim tasenba kübok tir aser parliament election ya anogo ka nung dang agir.

Turkey rongsenketzüng kanga mejungi akümba aser civil right aser freedom tamajungba küma aoba atema opposition party temi Erdogan dak tai tongloktsüogo aser ashiba agi, sorkar inyakyim ya nisung kati dang yimsü asüba ama kumogo. Iba presidential system ya 2017 küm tera agi dang agizük aser 2018 küm election nungi benoka inyaksangshi tenzüük.

Taküm election ya June ita agitsü liasü, saka ruling party züngsemtemi ashiba agi, iba ita ya summer aser religious holiday tem den denchiteper, aser ibayongji jelia agitsüsa kumogo.



France tzüyim sepaitemi apuba assault rifles aser missiles tem rong tema nung yua aliba noksa nung angur. January ita France naval forces temi Gulf of Oman nung assault rifles, machine guns aser anti-tank missiles meyerijang aika puogo, koba Iran nungi Yemen nung Houthi nunger telungpir dangi aorba liasü, ta ketdangtsür temi ashi.

## Linük 40 jungnüai 2024 Olympics nung madentsü akok: Poland sports minister

**Warsaw, Tsüklai/February 03 (Agencies):** Poland indang sports aser tourism minister Kamil Bortniczuk-i ashiba agi, Olympic Games alitsü menüngdak kumdaktsütsü mechi linük 40 jungnüai Paris Olympics nung madentsü akok. Bortniczuk-i ashiba agi, linük 40 agi tentetba coalition ka yangertsü ya akoktsü ama amanger aser yangji Great Britain, United States aser Canada densema February 10 nü senden ka amentsü lia IOC indang sentong nokdangba nung yaritsü.

"Itemji asadagra, Olympics matongdang telemtetba tem agiba nung tetsükdaktsü tasakbo majurutsü ama bilemer aser asenoki Games nung madentsü asünungbo asenok adentsüba coalition yagi Games alitsü menüngdak kumdaktsütsü," ta pai ashi.

Paris nung neutral flag ka kübok Russia aser Belarus nungi saisaponger tem shilem agitsü asoshi lenmang bushitsü,

kechiaser passport mechi saisaponger tetoktepba nungi menokdangtsüla, ta taoba hopta IOC ajanga sangdonga liasü.

Iba yongji, iba amaji inyakra Ukraine-i Paris Olympic Games nung shilem magitsü, ta amokmerena liasü.

Brehostibarnü Baltic states tem - Estonia, Latvia, Lithuania - aser Poland lungjemer IOC sentong ya aija liasü. Tashiyim amshiba linüktem, Russia aser Belarus, international competitions nung adentsü jaokba ajanga Russia-i Ukraine nung raraba ya ozüing agi melaba maparen ka ama kumdaktsütsü, ta shia liasü.

Latvia, Lithuania, Estonia aser Poland nungi sports minister temi ashiba agi, Russia aser Belarus nunger international competitions nung tanaben shilem agitsü melaba ajanga saisaponger tem jenjang tasak ka nung yutsütsü aser Russia aser Belarus nunger den tokteptsü mesüra saisapong sentong nung parnok aser

parnok busemer ajurutsü ya tebilemstü tali asütsü.

"Russia aser Belarus nunger saisapongertem international sports competitions nung neutrality kübok shilem agidaktsütsü merangba ajanga yimtenren tsütsü telemtetba tem ozüing agi melaba ama kumdaktsütsü aser saisapong amshia item linük indang olulu prokshiba agi ozüing alema Ukraine amakba nung temolung agütsüba nung temdangsunangtsü," ta sangdong ajanga ashi.

Brehostibarnü question-and-answer document ka adoktsüba nung IOC ajanga ashiba agi, "Olympic Games nung shilem magitsü amokmerenba ya Olympic Movement indang tamendak dak anema lir. Iba asayamung nung shilem magiba ajanga parnok yimtenren tebilem nung takok mangutsü saka shilem magiba NOCs indang saisaponger tem ang merenshitsu."

## IBA World Ranking nung India jenjang 3 buba nung lir

**New Delhi, Tsüklai/February 03 (Agencies):** International Boxing Association (IBA) indang tesüsaba world ranking nung India ya jenjang tasembuba tongtetogo.

Boxing Federation of India (BFI) indang boxer temi alakteta shilem agiba ajanga India ya ranking points 36300 ngutet aser iba jakdang Kazakhstan (48100) aser Uzbekistan (37600) dang lir.

Parnoki USA aser Cuba ama boxing powerhouse linüktem densema alem, shirnok tang asadanga nung jenjang pezü buba aser toku buba nung nokdaka lir.

"Ibai India, BFI, boxer aser fans ajunga asoshi alizüing ka lir. Küm ishika jakdang jenjang 44 buba nung liasü aser tang jenjang asem buba nung lir, Indian boxing mera tulu agiogo. India ya boxing powerhouse kumdaktsütsü asoshi BFI meranga inyaka aru aser arishi küm telemsa ajak atema asayar nem facility tajungtiba agütsü, temolung uludaktsüba nung

yarua mapang shia state aser national championship tem ayongzük, foreign exposure trips anir ao aser nungdakba teyari agütsü. Iba ranking yagi India ya boxing nation ka ama kanga kera ainba sayur aser aliba nung jenjang tajung nung aliba sayur, koba tesüiba küm ishika tsüingya yanglutet," ta Boxing Federation of India tir Ajay Singh-i ashi.

Küm ishika tsüingta Indian boxing kanga inogo kong team temi World Championships, Asian Games aser Commonwealth Games ama global multi-nation tournament tem nung temaba jenjang pongu tongteter,

Taoba CWG ana nung Indian boxer temi medal 16 ngutet aser 2008 küm nungi tenzüka international sentong tulutem nung Indian Boxer temi medan 140 tashi nguteta lir.

2016 küm nungi Indian boxer temi tetsür aser tebur category nung 16 Elite World Championships medals nguteta lir. BFI yagi linük nung international sentong tulu aika

ayongzüka arur aser March 15 nungi 26 tashi India nung Women's World Boxing Championships asemben buba ayongzüksü lir.

"International tournament tulu ayongzükba ajanga saisapong nung lisopur aintsü ajungshiba nung shilem tulu agir aser tarutsü putui iba asaya nung temolung agütsütsü ajungmesor. 2017 küm Guwahati nung Youth Women's World Boxing Championships ayongzükba, 2018 küm New Delhi nung Elite Women's World Boxing Championships ayongzükba aser tang asem buba World Elite Women Championships ayongzüksü aliba ajanga alimai asen dak iba ama asayamung tulu ayongzüksü tashi aliba nguogo."

Tesüsaba Youth World Championships ana nunga India nungi junior aser youth level nung medal 22 nguteta lir, anungji India nunger tarutsü nung boxing asayar dak sempet aliba sayur.



Bangkok nung Thailand Open Super 300 badminton tebur kija quarterfinals Hokulbarnü asayadang India nunger shuttler B Sai Praneeth-i China nunger Lin Shi Feng makok tembanga liasü. Iba asaya nung Lin Shi Feng-i Praneeth madak 17-21 23-21 18-21 agi takok ngua liasü.

## Mulungnen

"Kechiyong Pai kodanga marakzui alitsü. Ochishirbo teti tatem maka bilemteta alitsü". T.Ken 112:6



Late Ningshitemjem Changkiri  
10th March 1983 - 29th January 2023

Onok asür Lt. Ningshitemjem Changkiri kinungertemi, kanga nungdaka aliba mapang sarasadem, tajungshi o, rongsen aser anibelem mesasai nübu agi shirnokisa onok nongita yariogo nenok ajak dang kanga pelaba lemsateper.

Nenok temeim aser teyari onoki kodanga mamatoktsü.

Temeim kinungsü aser kinungertem.

## JDU candidate-i party... (Tapak 1 nungi...)

**JDU Nagaland nem Regional Autonomy agütsür:**

JDU indang High Command Regional Autonomy agütsüogo, ta president Senchumo NSN Lotha aser General Secretary Imsumongba Pongen nati sangdong ka nung ashi.

Election agiba sülen NDPP aser BJP dena political party mashii den lokteptsü atema State Unit nem tashi agütsüogo ta tenatisa ashi.

"Political party kari election magidang JDU den tesentaktep yunüa asüngdang saka election magidang onoki shinga dena melokteptsü" ta JDU Nagaland ketdangpurtemisa metetdaktsü.

Tang tashi nung nisung 25 temai JDU ticket meshia lir aser ano candidate aikati meshitsü imlar saka onoki takok angutsü ta ajitetba constituency tem nung dang tokteptsü, ta parnokisa ashi.

## J&K nung ama BJP-i Nagaland... (Tapak 1 nungi...)

BJP-i Uniform Civil Code (UCC), Citizenship Amendment Act (CAA) aser National Register of Citizens (NRC) amala tashiyim ozüingtem kübok Nagaland nung alirtem alenbangtsü, ta laisa shisem.

"Ochimashi agi sünga aliba Rio'er sorkari operation lotus aser BJP indang Hindu Rashtra project atema lenmang lapoktsüogo. Assam aser Meghalaya nung inyakba ama Chief Minister Rio-i BJP kanga peladaktsütsü meranger" ta Congress lennirisa ashi.

2024 general elections nung BJP-i UCC atema tenangzükba agitsü. India nung recognised tribes 705 nungi Naga kin 17 indang maitüsü khenyongi balaka lir saka BJP-i ibaji hao ta melii UCC yanglutsü, ta laisa metetdaktsü.

CAA ozüing den NRC benokba ajanga Nagaland nung alirtem talidak malitsü kechiyong BJP-i meshiba kulitem magütsütetsü ta

Mahima-isa ashi.

Khristantem aliba lima temulung nung Trishul aitaaktsütsü atema kanga meranga inyakdar ta taoba mapang Naga People's Front president aser taoba chief minister Surhozeli Liezietsu-i shia lir. Anungji BJP-i Hindu linük küm daktütsü atema inyakba maparen ajanga Naga nunger sobaliba raksadaktütsü asü pai anema ola adoktsü ta Mahima-isa Rio dang asüngdang.

"Yimyim ayimba politics ajanga lisopurtem temeten indang politics madak takok ngudaktsütsü asü Nagaland nung voter temi lokti nung telemsa adokdaktür, tesempatep adokdaktür aser Hinduisation asürtem anema noktak? ta laisa asüngdang.

"Naga nungeri pei maitüsü aser sobaliba atema noktaktü asü tashimait sorkar atsüngdoktsü?" ta Mahima-isa asüngdang.

## BILEMDANGANG

"Nisung ka ajanga tatok agütsür, nisung ana ajanga longjemshir."